

## SAMOA

### Faatulagaina o Aiaiga

#### IGOA

1. Igoa puupuu ma le amataga
2. Faamatalaina o uiga o upu
3. Tulafono e noatia ai le Malo
4. Faamoemoe

**VAEGA I  
FAATUINA MA LE UMIA O  
FAALAPOTOPOTOGA TAU  
FEFAATAUAIGA A LE  
MALO**

5. Faaliliuina atu i le Tulafono o Kamupani 2001
6. Sea umia faa Minisita
7. Faamatuuina atu o sea

**VAEGA II  
SINI A  
FAALAPOTOPOTOGA TAU  
FEFAATAUAIGA A LE  
MALO**

8. Sini atu e aveia ai ma pisinisi manuia

**VAEGA III  
NOATIAGA TAU GALUEGA  
I NUU MA ALALAFAGA**

9. Faamatalaina o noatiaga tau galuega i nuu ma alalafaga
10. E mafai e le Minisita ona faatonuina se noatiaga tau i galuega i nuu ma alalafaga
11. Ia mulimulitai le Minisita i taualumaga e faatatau i noatiaga tau i galuega i nuu ma alalafaga
12. Taulumaga mo le tuuina atu o se faatonuga mo se noatiaga tau i galuega i nuu ma alalafaga
13. Solitulafono i le faatonuina i ala faasolitulafono o le Faatonu po o le Komiti Faatonu

**VAEGA IV  
SINI A  
FAALAPOTOPOTOGA TAU I  
FAAMANUIAGA A LE  
MALO**

14. Sini atu e aveia ai o se Faalapotopotoga Tau Faamanuiaga manuia

**VAEGA V  
TOFIGA MA TIUTE O  
FAATONU**

15. Filifiliga ma le Tofiga o Faatonu
16. Tiute o Faatonu o Faalapotopotoga Tau Fefaatauaiga a le Malo
17. Faaiuga e faia e Faatonu o Faalapotopotoga Tau Fefaatauaiga a le Malo
18. Tiute o Faatonu o Faalapotopotoga Tau Faamanuiaga a le Malo
19. Faaiuga e faia e Faatonu o le Faalapotopotoga Tau i Faamanuiaga a le Malo
20. Tautinoga o aia tau tupe ma moliaga ua faamaonia faaletulafono
21. Faaiuga e faia e Faatonu o lo o aafia i aia feteenai

**VAEGA VI  
TULAGA E MAFAI ONA  
TALI ATU AI**

22. Fuafuaga Autasi
23. Lipoti o Faamatalaga o Tupe Maua ma Tupe Alu, Faamatalaga Tau Tupe ma Faamatalaga

24. Sueina faasuetusi o le faatinoga o galuega
25. E noatia Faatonu i le faateaina
26. O le Failautusi o Tupe e tauaveina le iloiloga o le faatinoga o galuega
27. Pule ma Suetusi Sili o le a avea ma Suetusi a Faalapotopotoga a le Malo ma ona lala.

**VAEGA VII  
LAGOLAGO MO  
FAALAPOTOPOTOGA A LE  
MALO MA FAATONU**

28. Lagolago e faia e le Failautusi o Tupe

**VAEGA VIII  
ISI MATAUPU**

29. Siitia atu o galuega mai le Matagaluega o Tagata Faigaluega a le Malo
30. Pule
31. Faamatuu atu e faia e Minisita o lo o umia sea, Pule ma Suetusi Sili le Failautusi o Tupe
32. Tulafono Faatonutonu

---

2001, Nu. 13

**O SE TULAFONO e siitia ai le faaleleia o le faatinoga o galuega ma le mafai ona tali atu e tusa ai o Faalapotopotoga a le Malo, ma i lenei faamoemoe, e:**

- (a) Faamaoti ai taiala aloaia o lo o pulea ai aiaiga o le faagaioia o Faalapotopotoga a le Malo; ma**

- (b) Faamaoti ai taiala aloaia ma tualumaga mo le tofiga o Faatonu o Faalapotopotoga a le Malo; ma**
- (c) Faavae ai manaoga e faatatau i le mafai ona tali mai mo Faalapotopotoga a le Malo; ma**
- (d) Tuuina atu le lagolago mo Faatonu o Faalapotopotoga a le Malo. [21 Tesema 2001]**

**UA FAIA** e le Fono Aoaofaitulafono a Samoa i totonu o le Palemene ua potopoto e faapea:-

**1. Igoa puupuu ma le amataga-**(1) E mafai ona taua lenei Tulafono o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001.

(2) O lenei Tulafono o le a amata faamamaluina i le aso o le a fuafuaina e le Kapeneta ma lomia faasalalau i le Savali.

**2. Faamatalaina o uiga o upu-**(1) I totonu o lenei Tulafono ae vagana ai e ese se isi uiga e manaomia e le Mataupu:

“Tulafono” o lona uiga o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001:

“Komiti Faatino” o lona uiga:

- (a) E faasino i se Faalapotopotoga a le Malo e faapea o se kamupani, Komiti Faatonu o le Faalapotopotoga a le Malo;
- (b) E faasino i se faalapotopotoga a le Malo e faapea e le o se Kamupani, o le tagata o lo o umia tulaga i totonu po o e faasino i le faalapotopotoga a le Malo i lalo o le pulega a le tulafono e tutusa ma tulaga o le Komiti Faatonu o se kamupani;

“Tulafono o lo o pulea ai” o lona uiga o le Tulafono po o Tulafono ua faavaeina ma aiaia ai sini o pulega a le Malo ma faamoemoe o se Faalapotopotoga Tau i Faamanuiaga a le Malo.

“Faalapotopotoga” e aofia ai se kamupani, se faalapotopotoga faaletulafono, se itutino faaletulafono, se mea ua tausia faaletulafono, se faiga faapaaga ma se pisinisi soofaatasi:

“Faalapotopotoga a le Malo” o lona uiga o se faalapotopotoga o lo o aofia i totonu o le Faamatalaga I o le Tulafono ma so o se lala o se Faalapotopotoga a le Malo:

“Faalapotopotoga Tau i Faamanuiaga a le Malo” o lona uiga o se faalapotopotoga o lo o aofia i le Vaega B o le Faamatalaga I o le Tulafono ma so o se lala o le Faalapotopotoga Tau i Faamanuiaga a le Malo:

“Faalapotopotoga Tau Fefaatauaiga a le Malo” o lona uiga o se faalapotopotoga o lo o aofia i totonu o le Vaega A o le Faamatalaga I o le Tulafono ma so o se lala o se Faalapotopotoga Tau Fefaatauaiga a le Malo:

“Minisita e fitoitonu i ai” e faasino i se Faalapotopotoga a le Malo o lona uiga o le Minisita mo le taimi nei o lo o gafa ma lena Faalapotopotoga a le Malo:

“Sea” o lona uiga

(a) E faasino i se kamupani e faapea ua tuuina atu sea, se sea o so o se vasega;

(b) E faasino i se faalapotopotoga (e ese mai ai i se kamupani) e faapea o lo o i ai se tupe faavae, se aia i totonu po o se aia tatau i le tupe faavae atoa po o se vaega o lena tupe faavae, e ese mai ai i se aia po o se aia tatau e avea ai o se tagata o lo o nofo aitalafu ai;

(c) E faasino i se kamupani po o isi faalapotopotoga e faapea e leai se tupe faavae:

(i) so o se aia i totonu po o se aia tatau i so o se vaega o meatotino a le kamupani po o se faalapotopotoga e ese ai nai lo se aia i totonu po o se aia tatau e avea ai o se tagata o lo o nofo aitalafu ai; po o

(ii) pe afai e leai ni meatotino, se noatiaga tuusao po o e le mautinoa e faisao ai i tupe i po o le tauaveina o tupe pau a le kamupani po o le faalapotopotoga;

ma “o le tagata e umia sea” e i ai le uiga e tutusa ai.

“Minisita e umia sea” o lona uiga o le Minisita o Tupe ma le Minisita e fitoitonu i ai:

“Lala” o lo o i ai le uiga lava e tasi e pei ona i ai i le fuaiupu 2 o le Tulafono o Kamupani 2001.

(2) O le Vaega A o le Faamatalaga I o lo o ua tuuina atu ai le faasologa o Faalapotopotoga Tau Fefaatauaiga a le Malo ma o le Vaega B o le Faamatalaga I ua tuuina atu ai le faasologa o Faalapotopotoga Tau i Faamanuiaga a le Malo. O le Faamatalaga I o lo o tuuina atu ai le faasologa o Faalapotopotoga a le Malo.

(3) E mafai ona teuteuina le Faamatalaga I mai lea taimi i lea taimi i tulafono faatonutonu e faia e le Ao o le Malo a e faia i luga o le fautuaga a le Kapeneta ma o ia tulafono faatonutonu e mafai ona aiaia ai mo teuteuga o faasologa o Faalapotopotoga Tau Fefaatauaiga a le Malo ma le faasologa o Faalapotopotoga Tau i Faamanuiaga a le Malo, e aofia ai le siitia atu o se faalapotopotoga mai le Vaega B i le Vaega A ma le Vaega A i le Vaega B.

(4) So o se tulafono faatonutonu e faia e tusa ai ma leni fuaiupu o le a faataatiaina i luma o le Palemene i totonu o le sefulu fa aso o le faia o tulafono faatonutonu po o, pe afai e le o tauaofia le Palemene, i totonu o le fitu aso o le amataga o le tauaofiaga e sosoo ai pe a tuanai le faasalalauina aloaia o tulafono faatonutonu.

**3. Tulafono e noatia ai le Malo** – O leni Tulafono o le a noatia ai le Malo.

**4. Faamoemoe** – O le faamoemoe o leni Tulafono ia faatupulaia ai le faatinoga o galuega ma le mafai ona tali mai a Faalapotopotoga a le Malo ina ia latou tuuina atu se auauanaga sili e mafai ai mo tagata o Samoa ma i le taunuuga o le a fai sao ai i le tulaga o le soifuaga i aso uma, i tulaga tau i le aganuu, o le tamaoaiga ma atinae tau pisinisi a Samoa.

**VAEGA I****FAATUINA MA LE UMIA O FAALAPOTOPOTOGA TAU  
FEFAATAUAIGA A LE MALO.**

**5. Faaliliuina atu i le Tulafono o Kamupani 2001** – E ui lava i aiaiga o so o se Tulafono e tatau i Faalapotopotoga Tau Fefaatauaiga taitasi a le Malo ona faamauina e avea o se kamupani i lalo o le Tulafono o Kamupani 2001 i se taimi ma i se faiga o le faamauina e pei ona fuafuaina e le Minisita o Tupe.

**6. Sea umia faa Minisita**–(1) I le noatia ma le fai fuafua i le faafuaiupu (2) e mafai e le Minisita o Tupe ma Minisita taitasi e fitoitonu i ai, mai lea taimi i lea taimi e avea ai ma sui o le Malo, ona fisaofaga mo po o se isi tulaga e ese ai i le mauaina o sea uma a se Faalapotopotoga Tau Fefaatauaiga a le Malo.

(2) Afai o se Faalapotopotoga Tau Fefaatauaiga a le Malo ua ulufale atu i se pisinisi soofaatasi po o i si vaega faaletulafono e faapea o sea a le Malo e itiiti ifo nai le 100% o lenei fuaiupu o le a faaogaina tau lava o sea o lena pisinisi soofaatasi po o isi itutino faaletulafono o lo o umia e le Malo.

(3) O le aofaiga o sea i totonu o se faalapotopotoga tau fefaatauaiga a le Malo o loo umia e Minisita taitasi o lo o umia sea e tusa ai ma le faafuaiupu (1) e tatau ona tutusa.

(4) So o se tupe e manaomia le totogiina atu e se Minisita o lo o umia sea i luga o se saofaga po o le faaogaina mo, po o ua faasoasoina, o sea e tusa ai ma le faafuaiupu (1) e tatau ona totogiina atu mai tupe ua faatatauina e le Palemene mo le faamoemoe ma o lenei Tulafono o le a faia ai le faatatauina o tupe ia lava lelei mo le faamoemoe o le Tulafono o le Pulega o Tupe a le Malo 2001.

(5) O Minisita o lo o umia sea o le a tali atu i le Palemene mo le faatinoga o galuega a Faalapotopotoga a le Malo i lalo o lenei Tulafono.

(6) O le Komiti Faatino o se Faalapotopotoga tau Fefaatauaiga a le Malo o le a tatau ona tali atu i Minisita o lo o umia sea.

(7) O le Komiti Faatino tau le faamanuiaga a le Malo o le a tatau ona tali atu i le Minisita e fitoitonu i ai.

**7. Faamatuina atu o sea**—(1) I le noatia ma le fai fuafua i leni fuaiupu e le tatau i se Minisita e umia sea:

- (a) Ona faatau atu po o se isi tulaga e faamatu e ese atu ai so o se sea i totonu o se Faalapotopotoga Tau Fefaatauaiga a le Malo o lo o umia i le igoa o le Minisita; po o
- (b) Ona faatagaina sea i totonu o se Faalapotopotoga Tau Fefaatauaiga a le Malo ina ia faasoaso atu po o le tuuina atu i so o se tagata e ese mai ai i se Minisita o umia sea, ae vagana ua tusa ai ma leni Tulafono.

(2) O se sea i totonu o se Faalapotopotoga Tau Fefaatauaiga a le Malo o lo o umia e se Minisita e umia sea faatoa mafai ona faatau atu po o se isi tulaga e faamatu e ese atu ai i luga o le faamaoniga a le Ao o le Malo e faia i luga o le fautuaga a le Kapeneta.

(3) E mafai e le Kapeneta, ona tapa mo le teu faafaigaluegaina i totonu o so o se Faalapotopotoga Tau Fefaatauaiga a le Malo e ala i saofaga mo le faatauina mai ma le mauaina o sea i totonu o le Faalapotopotoga Tau Fefaatauaiga a le Malo po o i so o se isi faiga o le teu faafaigaluegaina o tupe e pei ona faamaonia e le Kapeneta.

(4) E mafai e le Kapeneta:

- (a) Ona faamaonia le faatauina atu o sea po o so o se isi lava faiga o le teu faafaigaluegaina o tupe i totonu o so o se Faalapotopotoga Tau Fefaatauaiga a le Malo; ma
- (b) O se vaega o le faatauina atu o so o se sea po o i si faiga o le teu faafaigaluegaina o tupe, ua faamaonia le faatau atu po o le faaliliuina atu o ni sea po o sea uma o lo o umia e se Minisita o lo o umia sea i luga o ni tuutuuga ma aiaia e pei ona fuafuaina e le Kapeneta.

(5) I le noatia ma le fai fuafua i le faafuuiupu (6) e tatau i le Minisita o Tupe ona faataatia i luma o le Fono Aoao Faitulafono se lipoti i luga o le faatauina atu o sea po o isi faiga o le teu faafaigaluegaina o tupe ua faamaonia e le Kapeneta e

faatatau i so o se Faalapotopotoga Tau Fefaatauaiga a le Malo i totonu o le sefulufa aso o le faamaonia e le Kapeneta o le faatauina atu o sea po o i si faiga o le teu faafaigaluegaina o tupe po o, pe afai e le o tauaofia le Fono Aoao Faitulafono, i totonu o le fitu aso o le amataga o le Tauaofiaga e sosoo ai, ina ua tuanai le faamaoniga a le Kapeneta.

(6) Afai, i le manatu o le Minisita o Tupe o le faataatiaina i luga o le Laulau a Fono o se lipoti i lalo o le faafuaiupu (5) o le a i ai le aafiaga o le faaitiitia o le aoga o so o se Faalapotopotoga Tau Fefaatauaiga a le Malo po o so o se sea i totonu o se Faalapotopotoga Tau Fefaatauaiga a le Malo e tatau i le Minisita ona faapafala le faataatiaina i luga o le Laulau a Fono o sea lipoti vagana ua faamalieina o ia e faapea o le aoga o le Faalapotopotoga Tau Fefaatauaiga a le Malo po o sea i totonu o le Faalapotopotoga Tau Fefaatauaiga a le Malo o le a leai se aafiaga e feteenai ai i le faataatiaina i luga o le Laulau a Fono o sea lipoti ma, afai o sea lipoti ua iu lava ina faataatiaina i luga o le Laulau a Fono, e tatau i le Minisita o Tupe ona tuuina atu se faamatalaga tusinga faatasi ma le lipoti e faamatala ai le faatuai ona fai.

## VAEGA II

### SINI A FAALAPOTOPOTOGA TAU FEFAATAUAIGA A LE MALO

**8. Sini autu e avea ai ma pisinisi manuia**—(1) I le noatia ma le fai fuafua i le Tulafono o Kamupani 2001 o le sini autu o Faalapotopotoga uma Tau Fefaatauaiga a le Malo o le faagaioia lea e avea o se pisinisi manuia, ma i lenei tulaga:

- (a) Ia avea o se pisinisi ola ma maua tupe faasili e pei ona faatusatusa atu i pisinisi e le o umia e le Malo; ma
- (b) Faamalieina ai so o se noatiaga tau i galuega i nuu ma alalafaga ua faavaeina i lalo o le Vaega III o le Tulafono; ma
- (c) Avea o se tagata lelei e ana galuega; ma
- (d) Avea o se Faalapotopotoga e faaalua ai se agaga tauivi i tiute tauave o le soifuaga i aso uma i le silasila lea i le naunautaiga a nuu ma alalafaga o lo o faagaioia ai.



(2) Mo faamoemoe o le Tulafono o se tagata lelei e ana galuega o se tagata lea:

- (a) Na te faia lelei tonu ma le le faaituau i tagata faigaluega uma; ma
- (b) Tuuina atu tulaga lelei ma saogalemu mo galuega; ma
- (c) Filifilia, siitia ma tau i tagata faigaluega i luga o latou aoga eseese; ma
- (d) Tuuina atu i tagata faigaluega avanoa mo aoaoga ma atinae.

### VAEGA III

#### NOATIAGA TAU I GALUEGA I NUU MA ALALAFAGA

**9. Faamatalaina o noatiaga tau i galuega i nuu ma alalafaga**—(1) Mo faamoemoega o lenei Tulafono o se noatiaga tau i galuega i nuu ma alalafaga o lona uiga:

- (a) O le tuuina atu lea o se oloa po o se galuega e se Faalapotopotoga Tau Fefaatauaiga a le Malo i se tagata faatau po o se tagata e faaaogaina i luga o ni tuutuuga e ese mai ai i lo tuutuuga masani faapisinisi o lo o faaaogaina mai lea taimi i lea taimi; po o
- (b) Le ulufale atu i se maliega ua faia e se Faalapotopotoga Tau Fefaatauaiga a le Malo i luga o ni tuutuuga e ese mai ai i lo tuutuuga masani faapisinisi o lo o faaaogaina mai lea taimi i lea taimi; po o
- (c) Le onosaia e se Faalapotopotoga Tau Fefaatauaiga a le Malo e faatino ai se aia tatau po o se agavaa e ese mai ai i luga o tuutuuga masani faapisinisi o lo o faaaogaina mai lea taimi i lea taimi; po o
- (d) Po o le faamagaloina po o le faaititia e se Faalapotopotoga Tau Fefaatauaiga a le Malo o se aitalafu po o se aofaiga o tupe e tatau ona totogi atu i le Faalapotopotoga Tau Fefaatauaiga a le Malo e ese mai ai i luga o tuutuuga masani faapisinisi o lo o faaaogaina mai lea taimi i lea taimi.

(2) E leai se mea i lenei Vaega o le a puipuia mai ai se Faalapotopotoga Tau Fefaatauaiga a le Malo mai le faatinoina o se faaiuga faapisinisi e faia ai foai faameaalofa i mafuaaga taua po o le faia o tau o oloa ma galuega e i po o i lalo ifo o le tau na gaosia ai i latou.

**10. E mafai e le Minisita ona faatonuina se noatiaga i se galuega i nuu ma alalafaga** - I le noatia ma le fai fuafua i lenei Vaega e mafai e le Minisita e fitoitonu i ai ona faatonu se Faalapotopotoga Tau Fefaatauaiga a le Malo e tuuina atu se noatiaga tau i galuega i nuu ma alalafaga pe afai o le faatinoga o le noatiaga ua talafeagai lea e faamautinoa ai -

- (a) E faapea o lo o i ai avanoa aoao i se oloa talafeagai po o se auaunaga; po o
- (b) Po o le uunaia o se faiga faavae taua i aia a le atunuu e pei ona faasilasilaina e Le Ao o le Malo e faia i luga o le fautuaga a le Kapeneta; po o
- (c) O lo o i ai se avanoa lelei ma talafeagai ma le taimi e tali atu ai i se faalavelave faafuasei i le tulaga faalotoifale, faaitulagi, faaleatunuu po o le faava o Malo; po o
- (d) Faasaoina po o le faasaoina o se tulaga le amiotonu e pei ona faasilasilaina mai e le Komesina o Sulufaiga

**11. Ia mulimulitai le Minisita i tualumaga e faatatau i noatiaga tau i galuega i nuu ma alalafaga**—(1) I le faatinoga o so o se pule po o tiute i lalo o lenei Vaega e tatau i le Minisita e fitoitonu i ai ona mulimulitai i tualumaga o lo o aiaia i totonu o le Faamatalaga 2 e faatatau i le tuuina atu o se faatonuga i se Faalapotopotoga Tau Fefaatauaiga a le Malo e tuuina atu ai se noatiaga tau i le galuega i nuu ma alalafaga.

(2) So o se faatonuga e faia e se Minisita e fitoitonu i ai i lalo o lenei Vaega ua le usitaia le mulimulitai i tualumaga o lo o aiaia i totonu o le Faamatalaga 2 o le a tatau ona faaleaogaina.

**12. Tualumaga mo le tuuina atu o se faatonuga mo se noatiaga tau i galuega i nuu ma alalafaga**—(1) O tualumaga e ao ona mulimulitai i ai se Minisita e fitoitonu i ai e faatatau i le tuuina atu o se faatonuga i se Faalapotopotoga Tau Fefaatauaiga a le Malo e tuuina atu ai se noatiaga tau galuega i nuu ma alalafaga o lo o aiaia i totonu o le Faamatalaga 2.

(2) E mafai ona teuteuina le Faamatalaga 2 mai lea taimi i lea taimi i tulafono faatonutonu e faia e Le Ao o le Malo i luga o le fautuaga a le Kapeneta.

(3) So o se tulafono faatonutonu e faia e tusa ai ma lenei fuaiupu o le a faataatitia i luma o le Fono Aoaofaitulafono i totonu o le sefulufa aso o le faia o tulafono faatonutonu po o, pe afai e le o tauaofia le Fono Aoaofaitulafono, i totonu o le fitu aso o le amataga o le tauaofiaga e sosoo ai ina ua tuanai le faasilasilaina aloaia o tulafono faatonutonu.

**13. Solitulafono i le faatonuina i ala faasolitulafono o le Faatonu po o le Komiti Faatonu**—(1) So o se tagata o ia lea ua faatonuina ma le iloa lelei po o ua taumafai e faatonu se Faatonu po o le Komiti o Faatonu o se Faalapotopotoga Tau Fefaatauaiga a le Malo e faatino se noatiaga tau i galuega i nuu ma alalafaga e ese mai ai i aiaiga o le Tulafono ua nofosala i se solitulafono ma o le a noatia i se faasalaga e oo atu i le 100 iunite tau faasalaga [ST\$10,000].

(2) So o se tagata o ia lea, a o galue i le tulaga o se Faatonu o se Faalapotopotoga Tau Fefaatauaiga a le Malo, ua faia ma le iloa po o ua auai, po o taumafai e faia po o le auai, i le faia o se faaiuga e faatino ai se noatiaga tau i galuega i nuu ma alalafaga e ese mai ai i lo aiaiga o le Tulafono ua nofosala i se solitulafono ma o le a noatia i se faasalaga e oo atu i le 100 iunite tau faasalaga [ST\$10,000].

#### **VAEGA IV**

#### **SINI A FAALAPOTOPOTGA TAU I FAAMANUIAGA A LE MALO**

**14. Sini autu e aveva ai o se Faalapotopotoga Tau Faamanuiaga manuia**—(1) O le sini autu o Faalapotopotoga

uma Tau Faamanuiaga a le Malo o le tuuina atu lea o auunaga sili i ana tagata e faaogaina ma i lenei tulaga -

- (a) Ua faamalieina ai le faamoemoe ma sini o ana Tulafono o lo o pulea ai; ma
  - (b) O lo o faagaioia i se ala lava lelei ma aoga e pei ona faatusatusa i Faalapotopotoga e le o umia e le Malo; ma
  - (c) Galue e avea o se tagata lelei e ana galuega; ma
  - (d) Avea o se faalapotopotoga e faaalua ai se agaga tauivi i matafaioi o le soifuaga i aso uma i le silasila lea i naunautaiga a nuu ma alalafaga o lo o faagaioia ai.
- (2) O le faaupuga “o le tagata lelei e ana galuega” o le a tatau ona i ai le uiga lava e tasi e pei ona tuuina atu i le fuaiupu 8(2) o le Tulafono.

## VAEGA V TOFIGA MA TIUTE O FAATONU

**15. Filifiliga ma le Tofiga o Faatonu**—(1) O Faatonu uma o se Faalapotopotoga a le Malo o le a filifilia ma tofia po o le toe tofia e tusa ai ma tuutuuga mo filifiliga ma taualumaga mo le tofiga o faatonu i totonu o le Faamatalaga 3.

(2) O le tofiga po o le toe tofia o se Faatonu o se Faalapotopotoga a le Malo ua le usitaia le mulimulitai i tuutuuga mo filifiliga ma taualumaga mo tofiga i totonu o le Faamatalaga 3 o le a faamutaina ma faaleaogaina.

(3) O tuutuuga mo filifiliga ma taualumaga o tofiga o Faatonu o Faalapotopotoga a le Malo o lo o faatulaga atu i totonu o le Faamatalaga 3.

(4) E mafai ona teuteuina le Faamatalaga 3 i le Tulafono mai lea taimi i lea taimi i tulafono faatonutonu e faia e Le Ao o le Malo i luga o le fautuaga a le Kapeneta.

(5) So o se tulafono faatonutonu ua faia e tusa ai ma lenei fuaiupu o le a faataatiaina i luma o le Fono Aoaofaitulafono i totonu o le sefulufa aso o le faia o tulafono faatonutonu po o, pe

afai e le o tauaofia le Fono Aoao Faitulafono, i totonu o le fitu aso o le amataga o le tauaofiaga e sosoo ai ina ua uma ona faasilasila aloaia tulafono faatonutonu.

**16. Tiute o Faatonu o Faalapotopotoga Tau Fefaatauaiga a le Malo** – O Faatonu uma o se Faalapotopotoga Tau Fefaatauaiga a le Malo e tatau ona faamautinoa e faapea o lo o tausisia e le Faalapotopotoga Tau Fefaatauaiga a le Malo aiaiga o le Tulafono o Kamupani 2001 ma le fuaiupu 8 o le Tulafono.

**17. Faaiuga e faia e Faatonu o Faalapotopotoga Tau Fefaatauaiga a le Malo**—(1) O faaiuga uma e faia e Faatonu taitasi o se Faalapotopotoga Tau Fefaatauaiga a le Malo ma faaiuga uma e faia e Komiti o Faatonu taitasi o se Faalapotopotoga Tau Fefaatauaiga o le a tatau ona faia tonu lava ina ia tausisia ai aiaiga o le Tulafono o Kamupani 2001 ma e tusa ai ma le fuaiupu 8 o le Tulafono.

(2) O se tagata o ia lea, ao galue i le tulaga o se Faatonu o se Faalapotopotoga Tau Fefaatauaiga a le Malo, ua faia ma le iloa lelei so o se faaiuga e ese mai ai i lo le faamoemoe o le tausisia o aiaiga o le Tulafono o Kamupani 2001 ma e tusa ai ma le fuaiupu 8 o le Tulafono, ua nofosala i se solitulafono ma o le a noatia i se sala e oo atu i le 100 iunite tau faasalaga [ST\$10,000].

**18. Tiute o Faatonu a Faalapotopotoga Tau i Faamanuiaga a le Malo** – O Faatonu uma o se Faalapotopotoga Tau i Faamanuiaga a le Malo e tatau ona faamautinoa e faapea ua tuuina atu e le Faalapotopotoga tau i Faamanuiaga se auaunaga sili i ona tagata e faaaogaina e tusa ai ma le fuaiupu 14 o le Tulafono.

**19. Faaiuga e faia e Faatonu o le Faalapotopotoga Tau i Faamanuiaga a le Malo**—(1) O faaiuga uma e faia e Faatonu taitasi o se Faalapotopotoga Tau i Faamanuiaga a le Malo ma Komiti o Faatonu taitasi o se Faalapotopotoga Tau i Faamanuiaga a le Malo e tatau ona faia tonu lava mo le

faamoemoe o le faamautinoaina e faapea o lo o tuuina atu e le Faalapotopotoga Tau i Faamanuiaga a le Malo se auaunaga sili i ona tagata o lo o faaaogaina e tusa ai ma le fuaiupu 14 o le Tulafono.

(2) So o se tagata o ia lea, ao galue i le tulaga o se Faatonu o se Faalapotopotoga Tau i Faamanuiaga a le Malo, ua faia ma le iloa lelei so o se faaiuga e ese mai ai i lo le faamoemoe o le faamautinoaina e faapea o le Faalapotopotoga Tau i Faamanuiaga a le Malo o lo o tuuina atu se auaunaga sili i ona tagata e faaaogaina e tusa ai ma le fuaiupu 14 o le Tulafono o le a nofosala i se solitulafono ma o le a noatia i se sala e oo atu i le 100 iunite tau faasalaga [ST\$10,000].

**20. Tautinoga o aia tau tupe ma moliaga ua faamaonia faaletulafono**—(1) O faatonu uma o se Faalapotopotoga a le Malo, e tatau ona tuuina atu i totonu o le 2 masina o le amata faamamaluina o le Tulafono mai tausaga taitasi ina ua tuanai ia taimi, i le aso 30 o Iuni i le Minisita o lo o umia sea, ma le Pule ma Suetusi Sili, o le Failautusi o Tupe ma le Failautusi o Faamasinoga se Tautinoga o Aia Tau tupe ma moliaga ua faamaonia faaletulafono i le faiga o lo o aiaia i totonu o le Faamatalaga 4 o le Tulafono.

(2) O se faatonu o se Faalapotopotoga a le Malo ua le usitaia le faatinoina o ona tiute i lalo o le faafuaiupu (1) o le a tatau ona faaleaoga lona tofiga o le Faatonu i le taimi lava lea.

(3) O Tautinoga taitasi o Aia tau tupe ma moliaga ua faamaonia faaletulafono o le a avanoa mo asiasiga a tagata lautele i le Ofisa o le Failautusi o Faamasinoga i le faagasologa o itula masani o pisinisi i luga o le totogiina o se totogifuapauina ua faatulaga mai e tulafono faatonutonu.

(4) E tatau i le Failautusi o Faamasinoga ona tausia se tusi resitala o faasilasilaga o Aia tau tupe ma moliaga ua faamaonia faaletulafono ina ia mafai ai e tagata lautele ona faatino a latou aia tatau i lalo o le faafuaiupu (3).

(5) O le faiga ma le faasologa o mataupu o le Tautinoga o Aia tautupe ma Moliaga ua faamaonia faaletulafono o lo o faatulaga atu i le Faamatalaga 4.

(6) E mafai ona teuteuina le Faamatalaga 4 i le Tulafono mai lea taimi i lea taimi e ala i tulafono faatonutonu e faia e Le Ao o le Malo i luga o le fautuaga a le Kapeneta.

(7) So o se tulafono faatonutonu e faia e tusa ai ma lenei fuaiupu o le a faataatia i luma o le Fono Aoaofaitulafono i totonu o le sefulufa aso o le faia o tulafono faatonutonu po o, pe afai e le o tauaofia le Fono Aoaofaitulafono, i totonu o le fitu aso o le amataga o le tauaofiaga e sosoo ai pe a tuana'i le faasilasilaina aloaia o tulafono faatonutonu.

### **21. Faaiuga e faia e Faatonu o lo o aafia i aia feteenai-**

(1) O se tagata o ia lea, ao galue i le tulaga o le faatonu o se Faalapotopotoga a le Malo, ua faia ma le iloa lelei po o le auai i le faia, po o le taumafai e auai i le faia o se faaiuga pe afai o le tagata o lo o i ai se aia tau tupe po o isi aia o lo o feteenai ma aia a le Faalapotopotoga a le Malo ua nofosala ma o le a noatia i se sala e oo atu i le 100 iunite tau faasalaga [ST\$10,000].

(2) O se tagata ua faasalaina faaletulafono i lalo o lenei fuaiupu o le a faaleaogaina loa i lea taimi lana pule i lea Faalapotopotoga a le Malo ma isi Faalapotopotoga a le Malo o lo o avea ai lea tagata ma faatonu.

## **VAEGA VI**

### **TULAGA E MAFAI ONA TALI ATU AI**

**22. Fuafuaga Autasi-**(1) O le Komiti o Faatonu o Faalapotopotoga taitasi a le Malo e tataua ona saunia se Fuafuaga Autasi e tusa ai ma le Faamatalaga 5 i le Tulafono ma e tataua ona auina atu se ata o le Fuafuaga Autasi i Minisita taitasi e umia sea, Pule ma Suetusi Sili ma le Failautusi o Tupe ao lumanai le amataga o tausaga faaletupe taitasi.

(2) O le Fuafuaga Autasi e tataua ona aofia ai se Faamatalaga o Sini Autasi.

(3) O le faiga ma le faasologa o mataupu o le Fuafuaga Autasi o lo o faatulaga atu i totonu o le Faamatalaga 5.

(4) E mafai ona teuteuina le Faamatalaga 5 mai lea taimi i lea taimi e ala i tulafono faatonutonu e faia e Le Ao o le Malo i luga o le fautuaga a le Kapeneta.

(5) So o se tulafono faatonutonu e faia e tusa ai ma lenei fuaiupu o le a faataatia i luma o le Fono Aoaofaitulafono i totonu o le sefulufa aso o le faia o tulafono faatonutonu po o, pe afai e le o tauaofia le Fono Aoaofaitulafono, i totonu o le fitu aso o le amataga o le tauaofiaga e sosoo ai pe a tuanai le faasilasilaina aloaia o tulafono faatonutonu.

(6) O le Faamatalaga o Sini Autasi o lo o faasinomia i ai le faafuiauupu (2) o le a faataatia i luma o le Fono Aoaofaitulafono i totonu o le sefulufa aso o le taliaina e le Minisita e Fitoitonu i ai le Faamatalaga o Sini Autasi mai Faalapotopotoga a le Malo po o pe afai e le o tauaofia le Fono Aoaofaitulafono, i totonu o le fitu aso o le amataga o le tauaofiaga e sosoo ai ina ua uma ona taliaina e le Minisita e Fitoitonu i ai le Faamatalaga o Sini Autasi.

**23. Lipoti o Faamatalaga o Tupe Maua ma Tupe Alu, Faamatalaga Tau Tupe, ma Faamatalaga**—(1) E faaopoopo atu i lipoti o faamatalaga o tupe maua ma tupe alu, faamatalaga tau tupe, ma faamatalaga o lo o manaomia e le Tulafono o Kamupani 2001 po o tulafono o lo o pulea ai, po o le a lava le tulaga e i ai, o Faalapotopotoga taitasi a le Malo e tataua ona saunia lipoti o faamatalaga o tupe maua ma tupe alu, faamatalaga tau tupe ma faamatalaga e tusa ai ma manaoga o le Faamatalaga 6 ma e tataua ona auina atu se ata o ia lipoti o faamatalaga o tupe maua ma tupe alu, faamatalaga tau tupe, ma faamatalaga i Minisita taitasi o lo o umia sea mai le Pule ma Suetusi Sili ma le Failautusi o Tupe e tusa ai ma manaoga o le Faamatalaga 6.

(2) O le faiga o lipoti o faamatalaga o tupe maua ma tupe alu, faamatalaga tau tupe ma faamatalaga ma manaoga e faatatau i aiaiga o le faia o ata o ia lipoti o faamatalaga o tupe maua ma tupe alu, faamatalaga tau tupe ma faamatalaga o lo o faatulaga atu i le Faamatalaga 6.

(3) O le Faamatalaga 6 i le Tulafono e mafai ona teuteuina mai lea taimi i lea taimi i tulafono faatonutonu e faia e Le Ao o le Malo i luga o le fautuaga a le Kapeneta.

(4) So o se tulafono faatonutonu e faia e tusa ai ma lenei fuaiupu o le a faataatia i luma o le Fono Aoaofaitulafono i totonu o le sefulufa aso o le faia o tulafono faatonutonu po o, pe



afai e le o tauaofia le Fono Aoaofaitulafono, i totonu o le fitu aso o le amataga o le tauaofiaga e sosoo ai ina ua tuanai le faasilasilaina aloaia o tulafono faatonutonu.

**24. Suega faasuetusi o le faatinoga o galuega**—(1) E mafai e se Minisita o lo o umia sea po o le Failautusi o Tupe ona manaomia le Pule ma Suetusi Sili e faia se suega faasuetusi o le faatinoga o galuega a se Faalapotopotoga a le Malo.

(2) I luga o le talosagaina e ala i se tusi e se Minisita o lo o umia sea po o le Failautusi o Tupe e tatau i le Pule ma Suetusi Sili ona faia loa lava le suega faasuetusi o le faatinoga o galuega.

(3) I luga o lana lava lafo e mafai e le Pule ma Suetusi Sili ona sueina faasuetusi le faatinoga o galuega.

(4) Mo le faamoemoe o le Tulafono o se suega faasuetusi o le faatinoga o galuega o le a faia i le faiga o se suesuega e faia e le Pule ma Suetusi Sili i tulaga e tulai mai i le faatinoga o galuega a se Faalapotopotoga a le Malo ma e tatau ona aofia ai se suesuega e tusa ai o le faatinoga o so o se tiute po o matafaioi i lalo o le Tulafono, o le Tulafono o Kamupani 2001 po o so o se Tulafono o lo o pulea ai e so o se tagata, faatonu, Komiti o Faatonu po o le Faalapotopotoga a le Malo.

(5) I luga o le faamaeaina o se suega faasuetusi o le faatinoga o galuega e tatau i le Pule ma Suetusi Sili ona auina atu se lipoti i Minisita taitasi o lo o umia sea, le Failautusi o Tupe ma le Fofoga Fetalai o le Fono Aoaofaitulafono.

(6) I luga o le mauaina o so o se lipoti o lo o aiaia i lalo o le faafuaiupu (5) e tatau i le Fofoga Fetalai ona faataatia loa le lipoti i luma o le Fono Aoaofaitulafono.

(7) I le faia o se suega faasuetusi o le faatinoga o galuega o le a i ai i le Pule ma Suetusi Sili pule uma e pei ona talafeagai ai ma aoga ina ia mafai ai e le Pule ma Suetusi Sili ona tauave ana matafaioi i lalo o lenei fuaiupu.

(8) E aunoa ma le faatapulaa ai o le tulaga lautele o le faafuaiupu (7) o le a i ai i le Pule ma Suetusi Sili le pule:

- (a) E asiasia ai ma faia ata o so o se pepa aloaia, faila, faamatalaga o tupe po o faamaumauga (pe o pepa, faaeletoni po o i so o se isi faiga);

- (b) E ave faamalosi ai so o se pepa aloaia, faila faamaumauga (pe o pepa, faaeletoroni po o i so o se isi faiga), faamatalaga o tupe po o so o se komepiuta po o isi masini faaeletoroni, o masini pue leo po o nofoaga o faamatalaga.
- (c) E ulufale faamalosi atu ai i so o se nofoaga, pe afai e talafeagai ai, e saili mo, ma ave faamalosi se mea ua talitonu le Pule ma Suetusi Sili i luga o mafuaaga tatau ua manaomia e lagolago ai le faiga o le sueina faasuetusi o le faatinoga o galuega; ma

o le Komesina mo Galuega tau Leoleo ma le Failautusi o Tupe e tatau ona tuuina atu so o se fesoasoani e mafai ona talosagaina e le Pule ma Suetusi Sili ina ia mafai ai ona faamaeaina le sueina faasuetusi o le faatinoga o se galuega.

- (9) (i) e ese mai ai i so o se tulafono o lo o i ai nei po o i le lumanai o le a i ai i le Pule ma Suetusi Sili le pule e manaomia ai i so o se faletupe, faalapopotoga tau tupe, mea tausi faamavaega, tausi mavaega, tausitusi, loia, so o se isi vaega faaletulafono, Minisita, sui usufono o le Palemene, matagaluega a le Malo, Faalapopotoga a le Malo, ulu o matagaluega, tagata faigaluega a le Malo, po o so o se isi tagata e tali atu i so o se fesili o lo o manaomia ai le Pule ma Suetusi Sili le vaega po o se tagata ina ia tali i ai;

(ii) o pule a le Pule ma Suetusi Sili i lalo o le faafuaiupu 9(i) ua noatia i le na o le aia tatau a so o se tagata ua teena e tali i se fesili, pe afai ua talitonu le tagata e faapea o le a tausalaina ai lena tagata;

(iii) afai o se tagata ua musu e tali se fesili i luga o se mafuaaga tau ia, e tatau i le Pule ma Suetusi Sili ona tuuina i totonu o le lipoti auiliiliga o le tetee i le sueina faasuetusi o le faatinoga o galuega.

**25. E noatia le Faatonu i le faateaina** – Afai, ina ua tuanai le suega faasuetusi o le faatinoga o galuega, ua maua ai e faapea o se faatonu o se Faalapotopotoga a le Malo ua le usitaia le faatinoga o so o se tiute po o se galuega tauave e manaomia i se faatonu ona faia i lalo o le Tulafono, Tulafono o Kamupani 2001 po o se isi tulafono e puleaina ai e mafai e le Minisita e Fitoitonu i ai ona faateaina le faatonu mai le Faalapotopotoga a le Malo.

**26. O le Failautusi o Tupe e tauaveina le iloiloga o le faatinoga o Galuega**—(1) E mafai e le Minisita o Tupe ona faatonuina le Failautusi o Tupe i so o se taimi ina ia faia se iloiloga o le faatinoga o galuega a se Faalapotopotoga a le Malo i lona tulaga e mafai ai ona faamalieina ana noataga i lalo o le Tulafono, Tulafono o Kamupani 2001 po o so o se tulafono e pulea ai, ma e ao i le Minisita o Tupe ona fautuaina e ala i se tusitusiga le Minisita e ana le matafaioi e faapea o le a faia se iloiloga.

(2) E mafai e le iloiloga i lalo o le faafuaiupu (1) ona faatino se suesuega i se faiga e pei ona manatu le Minisita o Tupe ua talafeagai.

(3) I le faafoeina o se iloiloga i lalo o le (1), o le a tatau ona i ai uma pule i le Failautusi o Tupe e pei ona ua alaga tatau ai po o ua talafeagai ai ina ia mafai ai e le Failautusi o Tupe ona tauaveina ana galuega tauave i lalo o lenei fuaiupu.

(4) E aunoa ma le faatapulaaina o le tulaga lautele o le faafuaiupu (3) o aiaiga o faafuaiupu (8) ma le (9) o le fuaiupu 24 o le Tulafono o le a tatau ona faatatauina i so o se iloiloga ua faafoeina e le Failautusi o Tupe i lalo o lenei fuaiupu ma afai ua faasinomia le Pule ma Suetusi Sili i totonu o faafuaiupu (8) ma le (9) o le fuaiupu 24 o le Tulafono, o faamatalaga ua tatau ona faitauina e faasino i le Failautusi o Tupe ma pule a le Failautusi o Tupe.

**27. Pule ma Suetusi Sili o le a avea ma Suetusi a Faalapotopotoga a le Malo ma ona Lala**—(1) E ese mai ai i aiaiga o le Tulafono o Kamupani 1955, o le Tulafono o Kamupani 2001 ma so o se tulafono e pulea ai, e tatau ona avea

le Pule ma Suetusi Sili ma suetusi o Faalapotopotoga uma a le Malo ma lala o Faalapotopotoga a le Malo ma, mo le faamoemoe o le Tulafono o Kamupani 1955 ma le Tulafono o Kamupani 2001, e tatau ona i ai ma mafai ona faatino galuega tauave, tiute ma pule a se suetusi ua tofia i lalo o Tulafono ma pule uma e pei ona i ai i le Pule ma Suetusi Sili i lalo o le Tulafono o Pulega o Tupe a le Malo 2001 e tusa ai o tupe a le Malo, tupe faaletulafono faapea meatotino faaletulafono.

(2) E tatau i Faalapotopotoga uma a le Malo ona totogi atu i le Pule ma Suetusi Sili mo le tauaveina o ona tiute ma galuega tauave i lalo o lenei fuaiupu totogifuapauina i ni fua faatatau e le sili atu na i lo o totogi ua faatonuina e le Minisita o Tupe.

(3) E aunoa ma le faatapulaaina o aiaiga ua taua i lenei fuaiupu, e mafai e le Komiti Faatino o se Faalapotopotoga a le Malo, ina ua maea ona feutagai ma le Pule ma Suetusi Sili, ma afai o lena Minisita ua Fitoitonu ai ua faamaonia faapea, ona tofia se tagata po o se kamupani e faapea ua agavaa mo le tofiga e avea o se suetusi a se kamupani e avea o se suetusi faaopoopo i le Faalapotopotoga a le Malo po o so o se lala o ia kamupani.

## VAEGA VII

### LAGOLAGO MO FAALAPOTOPOTOGA A LE MALO MA FAATONU

**28. Lagolago e faia e le Failautusi o Tupe**—(1) E tatau i le Failautusi o Tupe ona tuuina atu i se Minisita e umia sea, faatonu faapea se Komiti o Faatonu o se Faalapotopotoga a le Malo ni:

- (a) Fautuaga ma fesoasoani e faatatau i Fuafuaga Autasi, Faamatalaga o Faamoemoega Autu Tuufaatasi ma lipoti faaletupe;
- (b) Iloiloga, fautuaga ma faamatalaga e faatatau i gaoioiga faatino o so o se Faalapotopotoga a le Malo ma le tausisia o le Tulafono e so o se Faalapotopotoga a le Malo po o se tagata;
- (c) Fautuaga mo Minisita o lo o latou umia sea i luga o tupe alu, tupe e tatalaina atu muamua, ma e

lagolago ai aitalafu ma mea e faamau ai aitalafu e ao ona faia, sailia po o le tuuina atu e faatatau i se Faalapotopotoga a le Malo;

- (d) Iloiloga faaletupe ma faapisinisi faapea faiga faavae a le Malo, ma fautuaga e faatatau i Faalapotopotoga a le Malo ma i le fesootai ai i le faatumaotiina o faalapotopotoga ma le faatumaotiina o Faalapotopotoga a le Malo;
- (e) Fautuaga i le tofiga o faatonu ma komiti faatino a Faalapotopotoga a le Malo faapea gaoioiga faatino a ia faatonu ma komiti faatino;
- (f) Faamatalaga ma fautuaga e faasino i faatinoga aupito lelei e faia e Faalapotopotoga a le Malo e umia ma faamalosia le tuuina atu o le auaunaga lelei atoatoa; ma
- (g) Faamatalaga ma fautuaga i Minisita o lo o umia sea pe a talosagaina ina ia faapea ona faia.

(2) E tatau ona feagai le Failautusi o Tupe ma le mataituina o gaoioiga faatino o Faalapotopotoga a le Malo i le avea ai ma sui o Minisita o lo o umia sea ma fautuaina ai Minisita o lo o umiaina sea e tusa ai o tupe teu faafaigaluega a le Malo i totonu o Faalapotopotoga a le Malo.

## **VAEGA VIII**

### **ISI MATAUPU**

**29. Siitia atu o galuega mai le Matagaluega o Tagata Faigaluega a le Malo**—(1) Vagana ai ua aiaia i se isi tulaga e ese mai ai i totonu o le Tulafono, o Faalapotopotoga uma a le Malo o le a mafai ona feutagai ma le Komisi e Pulea tagata faigaluega a le Malo i luga o tuutuuga o le galuega ina ia aofia ai i totonu o so o se maliega e ao ona faaofiina i totonu faatasi ma so o se tagata faigaluega ua siitia atu mai se galuega sa galue ai i galuega a le Malo, mo le faamoemoe o le faamaonia e faapea o lea maliega o lo o i ai i totonu tuutuuga e faapea e le itiiti ifo lo latou amanaiaina nai lo ia tuutuuga sa i luga o le tagata faigaluega i le taimi na faafaigaluegaina ai i lea lava taimi ao lumanai le siitia atu o ia.

(2) Mo le puipuiga o se masalosaloga, i luga o le faavaeina o se Kamupani a le Malo, o tagata faigaluega uma ua faaliliuina mai le faigaluega i galuega a le Malo i le Faalapotopotoga a le Malo o le a tatau ona siitia atu i luga o tuutuuga e le itiiti ifo le amanaiaina na i lo ia tuutuuga e mafai ona faaaogaina i lea lava taimi ao lumanai le siitia atu.

(3) O tagata faigaluega uma ua siitia atu o le a faafaigaluegaina mai galuega a le Malo i se Faalapotopotoga a le Malo, o le a tatau ona agavaa, e tusa ai ma so o se tulafono faatonutonu ua faia i lalo o lenei Tulafono, i le totagi o ia mea ua agavaa i ai e pei ona faapea ona faaputupu tu ao faagasolo lana galuega i galuega a le Malo.

**30. Pule** – E tatau i Le Ao o le Malo, Kapeneta, Minisita, Pule ma Suetusi Sili, Failautusi o Tupe, Failautusi o Faamasinoga, Komesina o Sulufaiga, Komesina o Leoleo, o Faalapotopotoga taitasi a le Malo ma Faatonu a se Faalapotopotoga a le Malo, ona i ai le pule e faia ai mea uma ua talafeagai ma ua tatau ona faia mo, po o e fesootai atu i gaoioiga faatino o pule ua faatulagaina, galuega tauave ma tiute i lalo o le Tulafono.

**31. Faamatuu atu e faia e Minisita e umia sea, Pule ma Suetusi Sili ma Failautusi o Tupe**—(1) E mafai e le Minisita e umia sea, o le Pule ma Suetusi Sili ma le Failautusi o Tupe ona faamatuu atu so o se pule ua faatulagaina, galuega tauave ma tiute i lalo o lenei Tulafono i se tusi, i le faasaoina mo lenei pule o le a faamatuu atu.

(2) Afai ua faamatuu atu e tusa ai ma lenei fuaiupu, o so o se faaiuga po o gaoioiga ua faia e se tagata o ia lea ua faamatuu atu i ai le pule, galuega tauave po o tiute, e tatau ona avea ma faamoemoega uma e pei ai ua avea o se faaiuga po o se gaoioiga a le Minisita e umia sea, le Pule ma Suetusi Sili po o le Failautusi o Tupe, e pei o le tulaga e mafai ai.

**32. Tulafono Faatonutonu** – E mafai e Le Ao o le Malo, ona faia i luga o le fautuaga a le Kapeneta ni tulafono faatonutonu mai lea taimi i lea taimi e faatonuina ai mataupu -

*(Faatinoga o Galuega ma le Mafai ona Tali atu)*

- (a) E manaomia pe faatagaina e le Tulafono ina ia faatonuina ia aofia ai teuteuga o Faamatalaga; po o
- (b) Talafeagai ma tatau ina ia faatonuina mo le tauaveina po o le tuuina atu o le faamamaluina o le Tulafono; po o
- (c) Faaceina atu faasalaga mo so o se mataupu i lalo o le Tulafono.

## **FAAMATALAGA**

### **Faamatalaga 1**

Faalapotopotoga a le Malo

VAEGA A - Faalapotopotoga tau i Fefaatauaiga a le Malo

VAEGA B – Faalapotopotoga tau i Faamanuiaga a le Malo

### **Faamatalaga 2**

Taualumaga e faatatau i Noataga tau i Galuega i  
Nuu ma Alalafaga

### **Faamatalaga 3**

Tuutuuga mo le Filifilia ma Taualumaga mo le Tofia o  
Faatonu o Faalapotopotoga a le Malo.

VAEGA A – Faalapotopotoga o Fefaatauaiga a le Malo

VAEGA B – Faalapotopotoga tau i Faamanuiaga a le Malo

### **Faamatalaga 4**

Tautinoga o Aia tau tupe ma Moliaga

### **Faamatalaga 5**

Fuafuaga Autasi

VAEGA A – Faalapotopotoga o Fefaatauaiga a le Malo

VAEGA B – Faalapotopotoga tau i Faamanuiaga a le Malo

### **Faamatalaga 6**

Lipoti o Faamatalaga o Tupe Maua ma Tupe Alu,  
Faamatalaga Tau Tupe, ma Faamatalaga

VAEGA A – Faalapotopotoga o Fefaatauaiga a le Malo

VAEGA B – Faalapotopotoga tau i Faamanuiaga a le Malo

---

**Lolomiina e le Failautusi o le Fono Aoaofaitulafono,  
i lalo o le pule a le Fono Aoaofaitulafono.**